



Fidoyilik —
Vatanga xizmat demak!

2025-yil 9-yanvar, payshanba,
3 (24.029)-son

O'zbek xalq
maqoli

Elning
yirtig'iga
yamoq bo'l,
uzuniga uloq
bo'l.

1913-yil aprel oyidan chiqa boshlagan



www.zarnews.uz

twitter.com/zarnews_uz

HARBIY XIZMAT — BURCH, MAS'ULIYAT VA SHARAF



“Vataning mustaqilligini, uning sarhadlari daxlsizligini va hududiy yaxlitligini, ona xalqimning tinchligi va osoyishtaligini, O'zbekiston Respublikasining milliy manfaatlarini hamda demokratik, huquqiy, ijtimoiy va dunyoviy davlat tuzumini so'nggi nafasimgacha himoya qilishga tantanali ravishda qasamyod qilaman!”.

Bu harbiy xizmatni o'tashga kirishgan har bir fuqaro tomonidan qabul qilinadigan muqaddas qasamyodning bir parchasi. Uni tantanali o'qish, yigirtlik burchini, Vatani, el oldidagi vazifasini ado etish yurtimizdagi har bir yigitning orzu-maqsadidir. Shu bois ular orasidan eng munosiblarini tanlab olish ham alohida mas'uliyat talab qiladi.

Shu kunlarda yurtimizda 2025-yilgi mudatli harbiy xizmatga chaqiriluvchilarni tanlovdan o'tkazish tadbiri qizg'in pallaga kirgan. Joriy yilning 10-fevraliga qadar davom etadigan saralash tadbirlari askar bo'lish orzusidagi mard o'g'lonlar hayotidagi muhim sinov hisoblanadi. Viloyatimizda ham jarayonning yuqori saviyada o'tishiga alohida e'tibor qaratilmoqda.

Aytish joizki, o'tgan vaqtda harbiy xizmatga chaqiriluvchi tadbirlarida qator islohotlar amalga oshirildi. Misol uchun, ilgari chaqiriluvchilar ro'yxatini shakllantirish faqat mudofaa ishlari bo'limlarining zimmasida edi. Joriy chaqiruv mavsumidan ayni mas'uliyatli vazifa mahallalardagi yoshlar yetakchilariga o'tkazildi. Yangi tartibga ko'ra, yoshlar yetakchilari o'z hududidagi yoshlar kontingentiga qarab, 5 nafargacha chaqiruv yoshidagi yigitlarni mudatli harbiy xizmatga jalb qilishi belgilangan.

Barcha chaqiriluvchilar umumijmsoniy tayyorgarligini aniqlash sinovlari hamda yakka tartibdagi suhbatdan o'tadi. Albatta, belgilangan normativlar murakkab emas - turnikda tortilish, 100 metr va 3 ming metr masofaga yugurish. Yakka tartibdagi suhbatda chaqiriluvchilarning mahalla va jamiyat hayotidagi ishtiroki, madaniya-

ti, qiziqishlari, O'zbekiston tarixi, buyuk sarkardalarimiz va ajdodlarimiz hayoti va faoliyatiga oid bilimlari baholanadi. Yakunda sinov natijalari umumlashtirilib, chaqiriluvchiga tavsiya berilishi yoki rad etilishi mumkin.

Ayrimlar mudatli harbiy xizmatni o'tayotgan harbiy xizmatchilarga oliy ta'lim muassasalariga o'qishga kirish uchun tavsiyanomalar berish tartibi bekor qilindi, degan noto'g'ri fikrda. Bu amaliyot bekor bo'lgani yo'q. Faqat endi u barcha harbiy xizmatchilarga berilmaydi. Mudatli harbiy xizmatni o'tayotgan harbiy xizmatchilarga O'zbekiston Respublikasi oliy ta'lim muassasalariga o'qishga kirish uchun tavsiyanomalar berish tartibi to'g'risidagi nizomga muvofiq, uni xizmat davomida jangovar va ma'naviy-ma'rifiy tayyorgarlik bo'yicha yuksak natijalarga erishgan, zarur bilim saviyasiga ega, namunali harbiy intizomini namoyon etgan harbiy xizmatchilar oladi.

Tavsiyanomaga ega bo'lgan fuqarolar respublikamizdagi oliy harbiy ta'lim muassasalaridagi tegishli ta'lim yo'nalishlariga o'qishga kirishda test sinovlari natijalariga ko'ra o'zlar to'plagan balni 50 foiz miqdorida qo'shimcha ball shaklidagi imtiyozga ega bo'ladi. Respublikaning boshqa oliy ta'lim muassasalari bakalavriyatiga o'qishga kirish uchun esa oliy ta'lim muassasalariga qabul parametrlaridan tashqari ajratiladigan alohida qabul ko'rsatkichlari doirasidagi tanlovdan ishtirok etadi.

Burxon QUVATOV,
viloyat mudofaa ishlari boshqarmasi boshlig'i, polkovnik.



JAMOAT TRANSPORTI YANGI TO'LOV TIZIMIGA O'TDI

2025-yilning ilk kunlaridanoq Samarqand shahri jamoat transportida o'zgarishlar ko'zga tashlandi. Yevropa tiklanish va taraqqiyot bankining “Yashil shaharlar” loyihasi doirasida keltirilgan 100 ta elektrobusning barchasi yo'nalishlarga chiqa boshladi. Shu paytgacha Brutto shartnomasi asosida 8 ta yo'nalishda 50 ga yaqin jamoat transporti harakatlangan bo'lsa, endilikda yo'nalishlar soni 12 taga, transportlar esa 150 taga yetkaziladi.

- Samarqand shahar transport va yo'l infratuzilmasini rivojlantirish rejasiga asosan, 43 ta yo'nalishdagi jamoat transporti Brutto shartnomasiga o'tkazildi, - deydi viloyat transport boshqarmasi boshlig'i Ravshan Tojiyev. - Hozirda elektrobuslar erkin harakatlanishi uchun keng va ravon yo'nalishlar aniqlanib, maxsus yo'laklar tashkil etilmoqda. Shuningdek, ular bilan yo'lovchilar uchun juda qulay bo'lgan Brutto shartnomasi tuzish ishlari olib borilmoqda.

Ayni vaqtda 8 ta elektrobus M-1 sonli “Temiryo'l vokzali - Xalqaro aeroport”, 10 tasi M-2 sonli “Vatanparvar mahalla-

si - Samarqand tuman markaziy shifoxonasi”, 8 tasi M-4 - “Temiryo'l vokzali - Siyob bozori” yo'nalishida, shuningdek, M-5, M-15-sonli Temiryo'l vokzalidan boshlanadigan xalqa yo'nalishlarda, T-3 va T-4-sonli Kimyogorlar qo'rg'onidan boshlanuvchi xalqa yo'nalishlarda hamda M-12-sonli “Hazora ABB-Siyob ABB” shahar avtobus yo'nalishlarida yo'lovchilarga transport xizmatini ko'rsatmoqda.

Brutto shartnomasi tuzgan jamoat transportida harakatlanishi uchun yo'lovchilar “ATTO” kartalaridan foydalanishi lozim. Chunki birinchi avtobusga chiqqan yo'lovchi 1600 so'm to'lov qilsa,

shu soatning o'zida ikkinchi avtobusga minganida 400 so'm yo'l haqi to'laydi. Agar yo'lovchi 3 va 4 marta avtobusga chiqqanida esa bepul harakatlanishi mumkin. Mazkur “ATTO” kartalarini “O'zbekiston pochta” aksiyadorlik jamiyati viloyat filialining barcha bo'lim va shoxobchalaridan xarid qilish mumkin. Bank kartalari yoki naqd pul bilan yo'l haqi to'lovchilar 2 ming so'mdan to'lashlariga to'g'ri keladi.

Brutto shartnomasi tuzgan avtobus haydovchilaridan kunlik tushum talab qilinmaydi. Chunki Brutto shartnoma asosida ishlashda bosib o'tilgan masofa va yo'lovchilarga sifatli xizmat ko'rsatilgani uchun to'lov tizimi yo'lga qo'yiladi. Endi jamoat transportlari erta tong soat 6:00 da yo'nalishga chiqib, kech soat 21:00 gacha harakatlanib, so'nggi yo'lovchini ham o'z manziliga yetkazib qo'yishga majbur bo'ladi. Ularning harakatlari GPS trekerlari bilan nazorat qilib borilmoqda.

Dilmurod TO'XTAYEV.

INDALLOSINI AYTGANDA...

Dilorom YORMATOVA,
professor.



- Dunyodagi eng yaxshi, o'xshashi yo'q hid yangi yopilgan non va tinch uxlayotgan go'dak hididir. Jahonda kuzatilayotgan turli vaziyatlar, global muammolar oziq-ovqat xavfsizligini asosiy masalaga olib chiqayotgan hozirgi davrda bu juda ahamiyatli.

**ODDIY O'YINLAR
BILAN TUZALAYOTGAN
BOLALAR**

“ZARAFSHON”ning



sahifasidagi videomateriallarni kuzatib boring!



Bu yil soliq sohasida qanday o'zgarishlar bo'ladi?

Bilib qo'ygan yaxshi

2024-yil 24-dekabrda “2025-yil uchun O'zbekiston Respublikasining Davlat budjeti to'g'risida”gi Qonun qabul qilindi. Ushbu qonun bilan 2025-yilgi soliq sohasidagi o'zgarishlar ham tasdiqlandi.

Unga ko'ra, foyda solig'i tovar (ish, xizmat)larning elektron savdosini amalga oshiruvchi soliq to'lovchilar uchun foyda solig'i stavkasi - 10 foiz etib belgilandi (oldin 7,5 foiz). Tovar (ish) larni eksportga realizatsiya qilishdan olingan foyda uchun 0 foiz stavkadagi soliq bekor qilindi.

Qayta tiklanuvchi energiya manbalari qurilmalaridan (umumiy quvvati 100 kVt gacha) foydalangan holda umumiy tarmoqqa, ya'ni “Elektroset”ga elektr energiyasini sotishdan olingan foydaga soliq solinmasligi belgilanmoqda. Bunda, qayta tiklanuvchi energiya manbalari qurilmalari ishga tushirilgan oydan boshlab 3 yil mobaynida foyda solig'i solinmaydi. Shuningdek, quyosh panellari quvvatining kamida 25 foiz miqdorida elektr energiyasini to'yash tizimi, ya'ni hajmi kattaroq bo'lgan akkumulyatorlar bilan quyosh panellari o'rnatilganda - bu panellar ishga tushirilgan oydan boshlab 10 yil davomida foyda solig'i solinmaydi.

MOBIL ALOQA XIZMATLARI UCHUN AKSIZ SOLIG'I OLINMAYDI

Aksiz solig'idagi o'zgarishlarga ko'ra, 2025-yil 1-yanvardan mobil aloqa xizmatlari uchun aksiz solig'i (10 foiz) bekor qilinmoqda. Shundan kelib chiqib, Soliq kodeksining 283, 284, 285 va 286-moddalariga o'zgartirishlar kiritilmoqda.

Tamaki mahsulotlari uchun aksiz solig'i stavkalari tenglashtirilmoqda. Xususan, filtri, filtrsiz sigaretalar, papirosalar, sigarillalar (sigaretalar), bidi, kretek uchun aksiz solig'i stavkasining foiz ko'rinishidagi qismi (10 foiz) bekor qilinmoqda hamda 1000 donasi uchun:

- respublikada ishlab chiqariladigan sigaretalarga 300 ming so'm;
- import qilinganlarga 330 ming so'm miqdorida belgilanmoqda.

Respublikada ishlab chiqariladigan va import qilingan etil spirti uchun aksiz solig'i stavkasi tenglashtirilib, 1 litri uchun 15 ming so'm etib belgilanmoqda;

- don distillyatiga (dondan olingan alkolgolga) nisbatan etil spirtiga belgilangan



stavkada aksiz solig'iga tortish hamda texnik etil spirtini ishlab chiqarishda foydalanilgan etil spirtining boshlang'ich fraksiyasiga aksiz solig'i qo'llamaslik nazarda tutilmoqda.

Respublikada ishlab chiqariladigan alkolgol mahsulotlarga aksiz solig'i stavkasini 10 foizga indeksatsiya qilib, 1 litr uchun 44 ming so'm;

Import qilingan alkolgol mahsulotlari uchun soliq stavkasi pasaytirilib, 1 litr uchun 76 ming so'm (amalda 101,5 ming so'm) miqdorida belgilanmoqda.

Respublikada ishlab chiqariladigan va import qilingan tabiiy vino, boshqa vinolar, shu jumladan, vermut, pivolariga aksiz solig'i stavkalari ham ishlab chiqarishda oshirish va import qilinganda pasaytirish orqali bosqichma-bosqich tenglashtirish nazarda tutilmoqda.

O'ZIMIZDA QAZIB OLINGAN TABIIY GAZNING REALIZATSIYASI UCHUN AKSIZ SOLIG'I 12 FOIZGA PASAYTIRILDI

2025-yil 1-apreldan neft mahsulotlariga (benzin, dizel yoqilg'isi, aviakerosin, motor moyi), shuningdek, benzinni, dizel yoqilg'isini va gazni yakuniy iste'molchiga realizatsiya qilishda aksiz solig'i stavkalari 10 foizga indeksatsiya qilinmoqda. Respublikada qazib olingan tabiiy gazni realizatsiya qilishdagi qo'llaniladigan aksiz solig'i stavkasi 20 foizdan 12 foizgacha pasaytirilgan holda import qilingan tabiiy gazni iste'molchiga realizatsiya qilishda xuddi shu kabi 12 foizlik aksiz solig'i stavkasini o'rnatish nazarda tutilmoqda.

(Davomi 2-sahifada) >>>

SUDYA

tarozisidagi

KO'RINMAS

pallalar

Ularni sahna yoki davralarning to'rida ko'rmaysiz. Jamiyat oldidagi xizmatlarini pesh qilib, alohida hurmat yoki ehtirom ham talab qilishmaydi. Sudya lavozimiga loyqlik mezonining asosiy shartlaridan biri ham shu. Shundanmi, barchamiz sudya kim ekanligini bilamiz-u sudyalik qilish mas'uliyati haqida tasavvurga ega emasmiz. Tajribali huquqshunos, viloyat sudining jinoyat ishlari bo'yicha sudyasi Farrux Samatov bilan noodatiy suhbatimiz orqali sudyalarning hayoti va faoliyatining o'ziga xos jihatlarini ochiqlashga harakat qildik.

Suhbatni umumiy savoldan boshlasak. Sizingcha bugungi kun sudyasi kim?

— Dunyoda kasblar ko'p va ularning har birida o'ziga yarasha mashuq-qat va qiyinchiliklar bor. Sudyalik esa ayni kasblarning eng murakkabi va o'z navbatida mas'uliyatliroq'i deb o'ylayman. Sababi sudyaning faoliyati natijasida insonlar taqdiri hal bo'ladi. Buni anglash, o'zini tarbiyalab voyaga yetkazgan, bilim va mansab bergan xalqi oldidagi javobgarlik hissini tuyish sudyalikning bosh mezonini hisoblanadi.

To'g'ri, sudda barchani rozi qilib bo'lmaydi. Lekin sudya hech kimning tarafdashi ham bo'lmaydi. Tarozni ushlab turgan Femia siyosining ko'zlari yopiqchilik sababi ham shunda. Ya'ni, hukm chiqaruvchi kimga adolat qilayotganini bilmasligi kerak.

Siz bu sohaga qanday kirib kelgansiz? Afsuslanish holatlari ham bo'lganmi?

— Oilamizda huquq-tartib bot idoralarda ishlovchilar yo'q. O'smirlikimizda sinfdoshimning prokuror otasi kiyib kelgan xizmat kiyimiga havas qilib, huquq sohasi-ga qiziqishim ortgan. Yillar davomida bu havas intilish, maqsadga aylanib, mayoq kabi yo'limni yoritdi. Huquqshunos bo'ldim, keyin sudyalik nasib qildi.

Sudyalikka o'tish jarayoni ham tez bo'lmagan. 11 yil davomida sudda xodim bo'lib ishlaganman. Keyinchalik tegishli malaka imtihonlaridan o'tib, sudyalikka tayinlandim. Albatta, tanlangan kasbim oson emas. Boshida sudya bo'lganimdan afsuslangan vaqtlarim ham bo'lgan. Lekin qiyinchiliklarni o'z ustimda ishlab, tajriba orttirib, yengib kelyapman.

Faoliyatingizdagi eng murakkab ishni eslang. U sizga nimani o'rgatdi?

— Faoliyatimdagi eng murakkab va yodimdan chiqmaydigan ish sudyalik vazifasiga endi tayinlangan vaqtlarimga to'g'ri keladi. Soxta tadbirkorlik bilan bog'liq iqtisodiy jinoyatni ko'rib chiqqanman o'shanda. Juda uzoq davom etgan ish. Hali amaliy tajribam kam bo'lgani uchun xato qilishdan qo'rqqanman.

Bu ish menga katta maktab bo'lgan. Egnimdagi yuqqa matoli mantiya qancha "yuk" bosishini o'shanda anglaganman. U orqali sudya ishida nafaqat huquq, balki iqtisod, hatto maktabdagi oddiy matematika fanidan olingan bilim ham asqotishini, sudya o'qib-izlanishdan to'xtamasligi kerakligini anglab yetdim.

Hukm o'qishda nimalar e'tiborga olinadi? Aytaylik, sudlanuvchining qaromog'ida oilasi, ota-onasi bor. Sud esa jazo muqarrarligini ta'minlashi kerak.

— Jinoyat kodeksida ayb uchun javobgarlik va javobgarlik muqarrarligi, degan tamoyillar bor. Avvalo, fuqarolar ham qonunni buzgani uchun javobgarlik borligi va bu javobgarlik muqarrar ta'minlanishini anglashi kerak. Shunda jinoyatlar soni kamayadi.

Sud masalasiga kelsak, unga

jazolovchi idora sifatida qarash noto'g'ri. Sudning maqsadi adolatni qaror toptirib, kelgusida sodir etilishi mumkin bo'lgan jinoyatlarining oldini olish hamda adashganlarni to'g'ri yo'lga qaytarish uchun ta'sir choralarni belgilashdir. Shu bois sudya ishni ko'rib chiqayotganda barcha omillarni e'tiborga oladi. Qaror chiqarishda yuqorida aytilgan natijaga erishish uchun qonunchilikda belgilangan eng maqbul yo'lni tanlaydi. Aytish joizki, bugungi qonunchiligimizda jazoni og'irlashtiruvchi holatlar aniq belgilangan bo'lsa, jazoni yengillashtiruvchi holatlarni qo'llashda cheklovlar yo'q. Sudya turli vaziyatlarni jazoni yengillashtiruvchi holat sifatida e'tirof etishi mumkin. Lekin sud qarori adolatlilik, qonuniylik va asoslilik degan uch tamoyildan chetga chiqmasligi kerak. Ya'ni, hukm sudyaning shaxsiy qarashini ifoda etmasligi lozim. Yakuniy qaror qonunda belgilangan tartibda va asosli bo'lishi shart.

Sudya o'z qarorining to'g'riligiga ishonchi komil bo'lmasa-chi?

— Bizda "maslahat siri" degan tushuncha bor. Ya'ni, sudya yakuniy qarorini qabul qilish uchun maslahat uyiga kirganda, sud zalida olingan barcha axborotni tahlil qiladi. Agar unda qarorining to'g'riligiga ichki ishonch bo'lmasa, hukm o'qilmaydi. Balki ish qo'shimcha o'rganish uchun qaytariladi.

Bu kabi holatlar tajribamizda ko'p bo'ladi. Sudyalik tergovchining xulosalarini tasdiqlab qo'yadigan mansab emas. Agar ko'rilayotgan ishni o'rganishda kamchilik bo'lsa yoki sudyaning boshqa biror shubhasi bo'lsa ham qaror chiqarishga shoshilmaydi.

Fuqaro sudyaning faoliyatidan norozi bo'lib shikoyat qilsa, qanday choralar ko'riladi?

— Bizda malaka hay'atlari bor. Agar sudya xizmat vazifasini lozim darajada bajaragan shubha bo'lsa, xizmat tekshiruv o'tkaziladi. Va u o'z tasdig'ini topsa, sudyaga nisbatan qonunchilikda belgilangan choralar qo'llaniladi.

Sud qaroridan norozilik ham sudya faoliyatini baholashning ikkinchi mezonini hisoblanadi. Bunda faqat yuqori instansiyada turuvchi sud tegishli qarorining adolatliligi, qonuniyligi va asoslilikiga baho berishi mumkin.

Masalaning boshqa tomoni ham bor. Ba'zan fuqarolar hali sud ishi yakunlanmasdan turib, ijtimoiy tarimoq orqali sudya faoliyatiga e'tirozlar bildirish, uni noo'rin aylash yo'li bilan sud qaroriga ta'sir o'tkazmoqchi bo'ladi. Buning uchun qonunchilikda javobgarlik belgilanganini unutmaslik kerak.

Sudyalarning ham inson. Ya'ni, ular ham xato qiladi. Buni sud ishining keyingi instansiyalarida to'g'rilash mumkindir, lekin "xato" qilish odatiy holga aylanmasligi kerak...

— Albatta, sudyalarning ham xato qiladi. Buning sabablari turlicha bo'lishi mumkin. Eng asosiylari - sudyaning tajribasizligi yoki ish hajmining ko'pligi. Ish kunini to'g'ri taqsimlash orqali ish hajmini minimallashtirishning



Bizning suhbat

imkoni bordir, lekin tajriba vaqt bilan keladi. E'tiborlisi, bugun tajribasi kam sudyalarning ham "Ustoz-shogird" an'anasi asosida malaka oshirishi yo'lga qo'yilgan.

Bilamizki, sudda doim yutgan va yutqazgan tomon bo'ladi. Yutqazgan tomon sud qaroridan rozi bo'lishi kamdan kam uchraydi. Buni to'g'ri qabul qilish kerak.

Sohaga taalluqli tadbirlardan birida "Sudya ishdan tashqarida ham sudya", degan fikr aytildi. Buning ma'nosi qanday?

— Bu yerda urg'u sudyaning qaror chiqarishiga emas, ko'proq yurish-turish madaniyatiga berilgan. Sudyalarning odobi kodeksi bor. Hujjat sudya uchun odil sudlovni amalga oshirish bilan bog'liq kasbiy faoliyati, shuningdek, xizmatdan tashqari vaqtda amal qilinishi lozim bo'lgan odob-axloq, xulq-atvor qoidalarini belgilaydi.

Unga ko'ra, sudya odob va axloqning umumiy tirof etilgan qoidalariga amal qilishi, har qanday vaziyatda haqiqatparvar bo'lishi, sud hokimiyatining nufuzini tushiradigan va sudyaning obro'-e'tiboriga putur yetkazadigan yoki uning xosligi, mustaqilligi va beg'arazligiga shubha tug'dirishi mumkin bo'lgan xatti-harakatlardan o'zini tiyishi shart. Shuningdek, u muayyan sud ishi bo'yicha huquqiy maslahat berishga va o'z fikrini bildirishga, shuningdek, sudda ko'rilgan yoki sud ish yurituvidagi ishlarni xizmatdan tashqari holatda muhokama qilishga haqli emas.

Turli vaziyatlar bo'ladi. Aytaylik, bir davrada o'tirgan tanishingizning ishini ko'rib chiqishga to'g'ri kelishi mumkin. Yoki kimdir yaqinlaringiz orqali ta'sir o'tkazmoqchi bo'ladi. Bularning oldini olish uchun ham to'g'ri ishlash va to'g'ri yashash kerak. Bir so'z bilan aytganda, sudya jamoat odami bo'la olmaydi.

Ochig'i, bu kasb tasavvur qilganimizdan ham murakkabroq ekan. Bir tomonga insonlar taqdiri, ikkinchi tomonga qat'iy intizom. Aytaylik, unda nega huquqshunoslar sudya bo'lishga intiladi? Faqat adolatni ta'minlash uchunmasdir?

— Savolning mazmunidan kelib chiqib, birdan aytaman - sudya bo'lib bo'yib ketolmaymiz. Hech milliarder sudyani ko'rganmisiz? Yo'q, albatta. Ishimiz qanchalik murakkab bo'lsa, shunchalar sharaflari hamdir. Sudyaning qarori bilan kimdir jazolanishi mumkin. Lekin shu qaror ikkinchi tomonning huquqlari tiklanishi, adolat ta'minlanishiga olib keladi. Tanganing ikkinchi tomonini ko'ra biladigan, ma-tonatli, sabrli insonlarga sudyalikka loyiq bo'ladi.

Sudya bo'lishni orzu qilayotgan yoshlarga qanday maslahatlaringiz bor?

— Bugun yurtimizda sud tizimini rivojlantirishga e'tibor ortgan. Xususan, sudya bo'lish talablari ham yengillashtirilgan. Lekin bu sudyalik qilish osonlashdi, degani emas. Yuqorida aytganimgdek, bo'yib ketish uchun sudya bo'laman, deyidigan adashadi. Ularga omadini tadbirkorlikda sinab ko'rishni maslahat bergan bo'lardim. Modomiki, kasbga mehr qo'yg'an ekan, bunday yoshlar tinimsiz o'qib-izlanishi, ham shaxs, ham mutaxassis sifatida kamol topishi kerak.

— Samimiy suhbat uchun rahmat!
Asqar BAROTOV suhbatlashdi.



BU YIL SOLIQ SOHASI

qanday o'zgarishlar bo'ladi?

(Davomi. Boshlanishi 1-sahifada).

2025-yil 1-apreldan tarkibida shakar mavjud bo'lgan gazlanmagan salqin choylar, meva sharbatlari, sanoat usulida ishlab chiqarilgan kompotlarning va boshqa gazlanmagan shakarli ichimliklarning 1 litri uchun ham 500 so'm miqdorida aksiz solig'i joriy etilmoqda. Bunda meva-sabzavotlardan tayyorlangan, tabiiy shirin (tarkibida fruktoza, glyukoza bo'lgan) va qo'shimcha shakar qo'shilmagan sharbatlar uchun aksiz solig'i qo'llanilmaydi.

Tarkibida shakar mavjud bo'lmagan, shirinlashtiruvchi yoki xushbo'yilashtiruvchi moddalar mavjud bo'lgan gazlangan ichimliklarning 1 litri uchun aksiz solig'i stavkasini 500 so'mdan 300 so'mgacha pasaytirish nazarda tutilmoqda. Shuningdek, gazlanmagan xuddi shunday ichimliklarga ham 1 litri uchun 300 so'm miqdorida aksiz solig'i stavkasi joriy etilmoqda.

MOL-MULK SOLIG'IDA QANDAY O'ZGARISHLAR BO'LDI?

Yuridik va jismoniy shaxslarning noturar obyektlari bo'yicha mol-mulk solig'ining asosiy stavkasini 1,5 foiz miqdorida saqlab qolgan holda soliq bazasini aniqlashdagi 1 kvadrat metr uchun o'rnatilgan minimal qiymat quyidagicha belgilanmoqda:

Toshkent shahri uchun - 3,3 million so'm (amalda 3 million so'm), Nukus shahri va viloyat markazlari uchun - 2,2 million so'm (amalda 2 million so'm) boshqa joylar uchun - 1,3 million so'm (amalda 1,2 million so'm).

Soliq kodeksining 422-moddasiga o'zgartirishlar kiritish orqali jismoniy shaxslarning turarjoy obyektlari bo'yicha jismoniy shaxslardan olinadigan mol-mulk solig'i stavkalari 10 foizga indeksatsiya qilingan holda quyidagicha belgilanmoqda:

respublika bo'yicha joylashgan, umumiy maydoni 200 kvadrat metrgacha bo'lgan uy-joylar va kvartiralar, dala hovli imoratlar uchun - 0,34 foiz;

shaharlarda joylashgan, uy-joylar va kvartiralar, dala hovli imoratlar uchun:

- 200 kv m dan ortiq va 500 kv m gacha bo'lganlar uchun - 0,45 foiz;

- 500 kv m dan ortiq bo'lganlar uchun - 0,6 foiz.

boshqa aholi punktlarida joylashgan, umumiy maydoni 200 kv metrdan ortiq bo'lgan uy-joylar va kvartiralar, dala hovli imoratlar uchun - 0,45 foiz etib belgilanmoqda.

IQTISODIY SAMARASIZ VA KAM HOSILLI BOG', TOKZORLAR UCHUN YER SOLIG'I UCH BAROBAR HISOBLANADI

Soliq kodeksining 428-moddasiga o'zgartirish va qo'shimchalar kiritish orqali 2025-yil 1-yanvardan yangi barpo etilgan bog'lar, tokzorlar va tutzorlar egalagan yerlar uchun yuridik shaxslardan olinadigan yer solig'i bo'yicha imtiyozni bekor qilgan holda soliq stavkasini 50 foizga kamaytirish tarzida imtiyoz berilmoqda. Bunda, imtiyozli muddat 5 yil sifatida saqlab qolinadi va vakolatli organ tomonidan iqtisodiy jihatdan samarasiz va kam hosilli deb topilgan bog', tokzorlarga nisbatan yer solig'i 3 baravarga oshirilgan holda hisoblanadi.

Vaqtinchalik soliq imtiyozlari. 2025-yil 1-yanvardan 2029-yil 1-yanvargacha nashriyot-matbaa faoliyati bilan shug'ullanuvchilar olingan daromadlaridan foyda solig'ini to'lashdan ozod qilinadi (foiz ko'rinishidagi daromadlar bundan mustasno). Buning uchun ushbu faoliyat turidan olingan daromadlar hisobot (soliq) davri yakunlari bo'yicha jami daromadining kamida 90 foizini tashkil etishi kerak.

2025-yil 1-fevraldan 2030-yil 1-yanvargacha O'zbekiston Respublikasi rezidentlari bo'lgan yuridik shaxslar eksport xizmatlari hajmi kalendar yil davomida 10 million AQSh dollaridan oshgan dasturiy mahsulotlar va axborot texnologiyalari texnologik parki rezidentlariga axborot texnologiyalari sohasidagi xizmatlarni ko'rsatishdan olingan daromadlari qismida (shu jumladan, royalti to'lanadigan) foyda solig'ini to'lashdan ozod qilinadi.

Istisno - O'zbekiston Respublikasi bilan ikki yoqlama soliq solishning oldini olish to'g'risida bitim tuzgan davlatlarning soliq rezidentlari mustasno.

2025-yil 1-yanvardan 2030-yil 1-yanvargacha tadbirkorlik subyektlari foyda solig'ini hisoblashda o'z mablag'lari hisobidan nodavlat umumiy o'rta ta'lim tashkilotlari binolarining qurish bilan bog'liq xarajatlarni 2 yil davomida teng ulushlarda ushbu binolar qiymatining amortizatsiya tarzida chegirib tashlanadigan xarajatlarga kiritishga haqli. Bunda ular ijtimoiy himoyaga muhtoj oilalarning farzandlarini bepul qabul qilish bo'yicha litsenziya talablarini bajarishlari shart, aks holda, bu amortizatsiya chegirimalari Soliq kodeksining 306-moddasida nazarda tutilgan

amortizatsiya normalarini qo'llash hisobidan bekor qilinadi.

Ijtimoiy himoyaga muhtoj fuqarolarni ish bilan ta'minlash bo'yicha manzilli imtiyozlar QQS va foyda solig'i stavkalari 2028-yil 1-yanvargacha qadar o'zgarmaydi (QQS 12 foiz, foyda solig'i 15 foiz (bazaviy stavka).

2025-yil 1-yanvardan 2028-yil 1-yanvargacha qadar tikuv-trikotaj, poyabzal va charm-attorlik sanoati mahsulotlarini ishlab chiqaruvchilar uchun foyda solig'i va xodimlari uchun jismoniy shaxslardan olinadigan daromad solig'i stavkalari 1 foiz etib belgilandi. Imtiyozni qo'llash uchun quyidagi barcha shartlarga bir vaqtning o'zida javob berishlari shart:

jami xodimlar sonining kamida 15 foizi ijtimoiy himoya yagona reestri va Kambag'al oilalar reestriga kiritilgan oilalar a'zolari bo'lishi;

har oyda har bir xodimga ish haqi miqdori mehnatga haq to'lashning eng kam miqdorining 2 baravari (2 310 000 so'm)dan kam bo'lmagan miqdorda hisoblanishi;

soliq davrida tikuv-trikotaj, poyabzal va charm-attorlik mahsulotlarini realizatsiya qilishdan tushgan umumiy tushumi jami tovarlarni (xizmatlarni) realizatsiya qilishdan olingan daromadning kamida 90 foizini tashkil etishi.

Ma'lumot uchun, charm, mo'yna xomashyosini va junni tayyorlash, saqlash hamda qayta ishlash, qoramolni avtomatlashtirilgan tarzda so'yish, jun, qorako'l va sun'iy charmdan buyumlar, charm-attorlik mahsulotlari, poyabzal ishlab chiqarish bilan shug'ullanuvchi soliq to'lovchilar 2026-yil 1-yanvargacha foyda solig'i, aylanmadan olinadigan soliq va yuridik shaxslar mol-mulk solig'idan ozod etilgan.

QQS zanjirini to'laqonli ta'minlash, shuningdek, bozorda teng sharoit va adolatli raqobat muhitini yaratish maqsadida 2025-yil 1-apreldan daromadidan qat'i nazar, farmatsevtika mahsulotlari savdosi bilan shug'ullanuvchi yoki tibbiy xizmat ko'rsatuvchi yuridik shaxslar QQS to'lovchisi bo'ladi. Bunda soliq to'lovchilar uchun QQSga o'tishda qo'shimcha yengillik yaratish maqsadida QQS hisobotlari soliq organlari tomonidan mavjud ma'lumotlar asosida avtomatik tarzda shakllantirib beriladi.

O'ZINI O'ZI BAND QILADIGAN SHAXSLAR UCHUN FAOLIYAT TURI KENGAYADI

O'zini o'zi band qiladigan shaxslar uchun faoliyat turlari ro'yxati kengaytirilib, "Artemiya tsist jonzodlarini yig'ish va topshirish" (dunyo tajribasida artemiya tsistalari asosida olingan mahsulotlar 5 ta sohada, ya'ni akvamaraniyat sanoatida, agrosanoat kompleksida, farmatsevtika, meditsina va kosmetologiyada keng qo'llaniladi) faoliyati qo'shildi.

Ko'chma savdo obyektlarini tashkil etgan yoshlarga soliq imtiyoz beriladi.

Soliq kodeksining 483-moddasiga kiritilgan o'zgarishlarga ko'ra, magistr avtomobil yo'llari bo'yida ko'chma savdo obyektlarini tashkil etgan yoshlar (30 yoshdan oshmagan shaxslar) faoliyatini amalga oshirish boshlangan sanadan e'tiboran istisnoliy muddat 6 oyda tovarlarni (xizmatlarni) realizatsiya qilishdan olingan daromadlar bo'yicha soliqni to'lashdan 2028-yil 1-yanvargacha qadar ozod etiladi. Ehtiyojmand oila a'zolarini ishga qabul qilgan tadbirkorlarga soliq imtiyoz beriladi.

Soliq kodeksining 483-moddasiga kiritilgan o'zgarishlarga ko'ra, mehnatga haq to'lash eng kam miqdorining 1,5 baravaridan kam bo'lmagan oylik ish haqi to'langan holda kambag'al oila a'zolarini ishga qabul qilgan tadbirkorlik subyektlari kambag'al oila a'zolari bo'lgan mehnatga haq to'lashga doir xarajatlari bo'yicha ijtimoiy soliqni 2025-yil 1-yanvardan 2028-yil 1-yanvargacha qadar 1 foiz (amalda 12 foiz) miqdorda to'laydi.

Prezidentimzimning 2024 yil 20-dekabrda "Hududlarda yuqori iqtisodiy o'sish va aholi bandligini ta'minlashning yangi tizimini yo'lga qo'yish hamda bu borada mahalliy hokimliklarning roli va mas'uliyatini oshirish chora-tadbirlari to'g'risida"gi farmoniga ko'ra, mahalliy davlat hokimiyati organlariga quyidagi moliyaviy imkoniyat va vakolatlar beriladi:

2025-yil 1-yanvardan aylanmadan olinadigan soliq, yuridik shaxslarning mol-mulkiga solinadigan soliq, yuridik shaxslardan olinadigan yer solig'i, davlat aktivlarini ijaraga berishdan tushumlarni to'liq hajmda hamda jismoniy shaxslardan olinadigan daromad solig'i tushumlarining kamida 50 foiz qismini tuman (shahar)lar budgetiga o'tkazish;

mahalliy davlat hokimiyati organlariga tegishli bo'lgan aksiyalar (ulushlar)ni sotishdan tushgan mablag'larning 90 foizi Qoraqalpog'iston Respublikasining respublika budgetiga, viloyatlarning viloyat budgetiga va Toshkent shahrining shahar budgetiga hamda obyekt joylashgan tuman (shahar) budgetiga teng ulushlarda taqsimlanadi.

Bekzod SOLIYEV,
viloyat soliq boshqarmasi davlat soliq bosh inspektori.

Navoiydan maktub

Hayotiy tajribam shuni ko'rsatdiki, agar inson birovga yaxshilik qilishni ko'ngildan istasa, u bu ishni qanday yo'l bilan bo'lmasin, amalga oshiradi. Umuman, qalbi toza odamlarning fikri-yodi doimo kimgadir yaxshilik qilishda bo'ladi, muhimi, ular buni turmush tarzi deb tushunadi. Samarqandda o'qib, kamol topib, shu ulug' naqlni anglab yetganim uchun ustozimning yaxshiliklarini eslashni lozim topdim.

Himmat ko'ngildan boshlanadi

Samarqand davlat universiteti fizika fakultetini tugatish arafasida oliygo-himiz Moskva davlat universiteti bilan hamkorlik shartnomasini tuzdi. Kafedra mudirimiz, rahmatli Ne'mat Badalov men va do'stim Sh.Xushmurodovning oxirgi ikki kursni Moskvada o'qishimizni ma'qul ko'rdi. O'zimizda ham qiziqish yo'q emasdi. O'sha paytda bizga Moskvadan ma'ruza o'qishga kelgan Tolib Mo'minov ustozimizga qarab "Domla, avvalo, shogirdlarga kuyinchak bo'lganligingiz uchun rahmat! Agar xo'p desangiz, bular diplomni olgach, shu ishni qilsak, aks holda, ular Samarqandga qaytmaligi mumkin", dedi. Tabiiyki, sal xafa bo'ldik, og'rindik, faqat o'qishni bitirgandan so'ng 1982-yilda Dubna shahriga, Birlashgan yadro tadqiqotlari institutiga aspiranturaga borganimizda Tolib Musayevich aytgan yo'l to'g'ri ekanligini his qildik. Negaki, ko'pchilik barvaqt kelganligi bo'lsami, shu yerda uyli-joyli bo'lib ketgan, yurtiga qaytishni o'ylamaydi ham. Biz esa uylanishga ulgurandik. Domla O'zbekiston uchun mutaxassis kadrlar naqadar kerakligini o'sha paytdayoq tushunib yetgan ekan.

Tolib Mo'minov aspirantura masalasida ham bizga chinakam himmat ko'rsatdi. ToshDU (hozirgi O'ZMU) huzurida amaliy fizika ilmiy tadqiqot instituti tashkil qilib, ana shu oliygo-himda ishlash uchun stajirovka va aspiranturaga yo'l ochdi. Bu ajratilgan o'rinlar bittasi kaminaga tegdi. O'shanda domla bilan rejalar haqida suhbatlashdik. Men Moskva davlat universiteti professori V.Shpinel bilan munosabatim borligi, o'sha kishining



oldiga borishim mumkinligi haqida aytдим. Ustoz esa "Bunday munosabatingni qo'llayman. Lekin sen hali talabalik kayfiyatidan chiqqaning yo'q. Moskvada qiynalib qolishing tabiiy. Yaxshisi Dubnaga yuboraman, ustozim Vladimir Morozovga tayinlayman, qiynalmaysan", dedi. Darhaqiqat, bu gal ham domlaning tutgan yo'li samara berdi. Yotoqxona va boshqa sharoitlar muhayyo etildi.

Dissertatsiyamni himoya qilib qaytgach, ilmiy tadqiqot institutida Tolib Musayevich bilan ganna nurlar albedosi yuzasidan birgalikda tadqiqot qilishga to'g'ri keldi. U kishi barchaga birdek munosabat qilardi. Ishlayotgan joyimizda yurakdan suhbatlashar, har bir xulosamizning mohiyatini so'rab olar, mabodo tushunmasak, izohlashdan erinmasdi.

Tolib domla amaliy fizika institutining Samarqand filiali hududida ixchamgina bog' ham tashkil qildi. Shogirdlari bilan nihol ekdi, poliz ekinlari yetishtirdi. Ustoz "Unutmanglar, ukalar, odamlar tomorqangizning ahvoliqa qarab, ichki madaniyatigizga baho beradi", derdi.

Oilaviy sharoitim tufayli Navoiy davlat universitetiga ishga ketdim. O'shanda shogirdlarim SamDUda magistraturada o'qib, T.Mo'minov

rahbarligida radioekologiya bo'yicha ilmiy tadqiqot olib bordi. Ularni yo'qlab borganimda domlani hamisha ish ustida yoki shogirdlariga nimanidir tushuntirayotgan paytda uchratganman.

2019-yilda Moskva muhandislik instituti Milliy yadro tadqiqotlari universiteti magistraturasiga tanlov o'tkazdi. Unda g'olib chiqqan shogirdlarim Sardor Adizov, Maqsudjon Xudoyberdiyev, Vohid Qudratov O'zbekistonda atom elektr stansiyasi qurilishida ishtirok etish uchun davlat dasturi asosida ana shu magistraturaga yuborildi. O'shanda Tolib Musayevich menga telefon qilib, "Tabriklayman, umringiz behuda o'tmayapti, ana shunday iqtidorli yoshlar bilan ko'proq ishlash kerak, ularni qo'llab turish lozim. Shogirdlaringizga qo'yilgan baho – sizga qo'yilgan bahodir", degani hamon qulog'imda jaranglaydi.

Xulosa o'rinda aytish mumkinki, jamiyatning bugungi bosqichi Tolib Musayevichdek bilimdon, bag'rikeng ustozlar nihoyatda kerakligini ko'rsatmoqda. Samarqandda esa bunday odamlar ko'plab topiladi va ularning safi ortib boraversin.

Eliboy XUDOYBERDIYEV,
Navoiy davlat universiteti professori.

Yo'lovchi mashinada keta turib, vodiy shevasida gapirayotgan yigitdan "mehmonga o'xshaysiz, yo'l bo'lsin", deb so'radim. U andijonlik ekani va xorijda besh yil birga ishlagan do'stining to'yidan, Qashqadaryodan kelayotganini aytdi.

Qashqadaryoda to'ylarda odam juda ko'p bo'lishini o'ylab, to'y zo'r bo'lgandir, dedim.

– E, nimasini aytasiz, amaki, – dedi u. – Mehmon ham ko'p kelarkan, shunga yarasha o'nlab qozon ovqat pishirilarkan. Toshkentdan nomdor artistni falon so'mga chaqirishibdi. Lekin men o'rtog'imning besh yil sovuq o'lkalarda ishlab

Ikki xil dunyoqarash

topgan pulini bir kunda sovranganiga ichim achidi. Eng yomoni, shuncha ovqat, taomlar hammasi yeyilgan emas, qanchasi isrof bo'ldi. Do'stimga "Sizga shuncha sarf-xarajat qilish nima zarur, shu pullarni uy-joyingizga, bolalaringiz o'qishi, yaxshi yeb-ichishiga sarflasangiz bo'lmaydimi, yangi ro'zg'or ekansiz" desam, "nima qilay, elchilik, bizda shunaqa qilib to'y qilmasangiz, odam qatoriga qo'shishmaydi" dedi mayus tortib. Xullas, kecha to'y o'tdi, bugun ertalab yo'lga chiqayotganimda endi nima ish qilmoqchisiz, shu yerda ishlaysizmi, deb so'rasam, o'rtog'im endi ota-onasini umra safariga yuborishni uyining chala qurilishini bitirish uchun yana chetga ketishini aytganda unga

nima deyishni bilmadim. Hamrohimning gaplarini eshitib, bunday holat yon-atrofimizda, ko'p joyda borligini aytdim. U esa "Bizda to'yni bunchalik dabdabali qilib o'tkazishmaydi, hozir odamlar ancha tartibga kelib qolgan", dedi.

– Qashqadaryolik o'rtog'im ikkimiz besh yil birga ishladik, xudoga shukur, yaxshi pul topdik, – dedi u. – Men ham qishloqda yashayman, sharoitim shunga yarasha edi. Pul topganimdan so'ng, avvalo, ota-onam va bolalarim uchun uyda qulay sharoit yaratishga e'tibor qildim. Bolalarimni qo'shimcha to'garaklarga berdim, o'qishi uchun nima zarur bo'lsa, qilaman. O'zim o'qimadim, farzandlarimni albatta, o'qitmoqchiman. Xotinimning qo'lida hunari

bor, uydan ayollar sarta-roshxonasi ochdik, yomon emas, ro'zg'orga yordam bo'lyapti. O'zim uchun ham bitta ustaxona ochdim, mashina ta'mirlaymiz, yonimga ukalarimni oldim. Endi chetga borib, sarson bo'lmoqchi emasman. Shu yerda ishlashim, pul topishim uchun imkoniyat yaratdim. Shuning uchun men qatorli ishlab pul topgan o'rtog'imning bor budi-ni bitta to'yga sarflab, yana u. – Men ham qishloqda yashayman, sharoitim shunga yarasha edi. Pul topganimdan so'ng, avvalo, ota-onam va bolalarim uchun uyda qulay sharoit yaratishga e'tibor qildim. Bolalarimni qo'shimcha to'garaklarga berdim, o'qishi uchun nima zarur bo'lsa, qilaman. O'zim o'qimadim, farzandlarimni albatta, o'qitmoqchiman. Xotinimning qo'lida hunari

Gap bilan bo'lib, manzilga yetib qolganimni sezmadim. Hamrohimning fikrlaridan zavqlanib, uning ishlariga omad tiladim. Qaniyki, boshqalar ham shu yigitdek fikrlab, o'ylab ish qilsa.

Ne'mat ASQAROV,
Past Darg'om tumani.

Oddiylik ham samimiyatdan

Yonimizdagi odamlar

Inson yil fasllarining ob-havosiga qarab kiyinadi, ishlarini shunga yarasha rejalashtiradi. Aks holda, u pand yeydi. Demochimanki, yoshiga munosib yashagan odamgina hayotda halovotga erishadi. Bundaylarni ko'pincha zamonasining odami, deymiz. Men taniqli olim, fidoyi nuroniy Suyun Karimovni ana shu toifaga mansub, deb hisoblayman.



S.Karimov bilan qariyb qirq yillik birodarman. Bu yillar mobaynida qancha suvlar oqib ketdi, bu boshlar hayot yo'li deb atalgan so'qmoqlarda nelarni ko'rmadi, ne sinovlarga duch kelmadi, deysiz. Ana shu suronli yillarda undagi iroda, toqat, shukronalik, nafsni tiya bilish tuyg'usi, bundan tashqari, otadan o'tgan ichki intizom hamda mulohazalik ana shu sinovlardan o'ta olish imkoniyatini berdi. Bunday xislatlari haqida "Shuhrat" medali bilan taqdirlandi. O'tgan yil esa "O'zbekiston Respublikasida xizmat ko'rsatgan yoshlar murabbiyi" yuksak unvoni bilan taqdirlandi.

Ammo omad har kimga ham nasib etavermaydi. Allomalar kitoblaridan o'qib, uqdimki, bolaligida ota-onadan ibrat oloigan, o'smirlikda ilm olishga ishtiyoq qo'ya olgan, yigitligida mukammal kasb egasi bo'lgan, keksayganda esa nasihat berishga munosib yashagan odamlarga omad yor bo'lar ekan. Bu inson ana shunday baxtli yurtdoshlarimizdan biri.

Nuroboddagi Ullus qishlog'ining old odami, taniqli chorvador Amir aka oilasiga hamma havas qilardi: bu xonadonda hovli tozaligidan to mehmon kutishdagi xizmatlar, dars tayyorlashlar, sport bilan shug'ullanishgacha qat'iy intizom bilan bajarilardi. Suyun Karimov ana shu oilada kamol topdi.

Ota-onadan olgan tarbiyasi SamDU o'zbek filologiyasi fakultetida o'qiganda ham, harbiy xizmatda ham, maktabda o'qituvchilik qilganda ham, tuman ijroqo'mida ishlaganida ham unga asqotdi. Shuning uchun o'ziga saboq bergan domlalar uni safiga chorlashdi.

Universitet tahrir-nashriyotida ishlab, ilmiy tadqiqotni boshlab yubordi. Shu ishtiy-oqi tufayli 4 yil viloyat partiya o'qituvchilik faoliyat ko'rsatdi va bugungi kunda Samarqand viloyatining obro'li ziyolisi sifatida safda turibdi.

Albatta, har kim avvalo, o'z kasbini puxta egallasagina izzat topadi. Bu aydida qahramonimizning vujudiga ota-onasining tarbiyasi, ustozlarining ibratlari orqali singib ketgan. U o'zining "Yuragimga yaqin odamlar" kitobida "Taqqir meni siyladi. Niyatlarimga yetdim. Alloh meni O'zbekistonda xizmat ko'rsatgan fan arbobi, professor, Samarqand stilistika maktabi asoschisi Rahmatulla Qo'ng'urov va taniqli adabiyotshunos olim Rahmonqul Orzibekov singari olijanob insonlarga duch qildi. Hayotda qanday yutuqlarga erishgan bo'lsam, ota-onam qatorida bunday ulug' insonlardan minnatdorman va ana shu qat'iy gaplarimni farzandlarim va shogirdlarimga meros qilib qoldiraman", deb yozgan.

Bunday ruhiyat bilan mehnat qilish, tabiiyki, inson faoliyatiga

baraka keltiradi. Suyun domla nomzodlik, doktorlik ishlarini ko'p qatori yoqlagan bo'lsa-da, tilshunoslik ilmidagi o'ziga xos maktab yarata oldi. Zulfiya, Abdulla Qahhor, Hamid Olimjon kabi adiblar asarlari tili stilistikasini o'rganish uslubini takomillashtirdi.

Shuning barobarida ustozlari R.Qo'ng'urovning hayoti, ibratli ilmiy pedagogik faoliyati haqida "Bo'lub ilmi hikmatdastod ustodi fan" nomli kitob yozdi. Darvoqe, domlaning rahbarligida olimlik darajasiga yetgan Azamat Pardayev, Shavkat Mahmadiyev, Baxtiyor Xolmuhammedov, Dilbar O'rinboyeva, Svetlana Umirova, Orzubonu Yusupova kabi shogirdlari ayni paytda bu kishi bilan bir safda tilshunoslik fanidan saboq bermoqda.

Olimning yutug'i shundaki, u ilm-fanni inson hayotini tabaruk qiluvchi jarayon sifatida tushunadi. Nafaqat shogirdlari, balki mahalla-ko'y oldida ham tilimizning latofati, adiblarning mahorati haqida gapirishdan erinmaydi. Ilmiy-adabiy davralarda doimo faol, ilm kishilarini e'zozlaydi, shogirdlarini ham shunga da'vat etadi. Ayniqsa, O'zbekiston xalq shoiri Usmon Azim, hofiz va olim Nazirjon Nazarov, adib va olim Siddiq Mo'min, professor Omonulla Madayev, Yormat Tojiyev singari ziyolilar bilan muntazam muloqotda bo'lishi bu insonning yuksak ma'naviyatiga ishoradir.

S.Karimov hayoti davomida boyligini mansabga intilmadi, 30 dan ziyod ilmiy to'plamlariga muharrirlik qildi, 40 dan ortiq kitoblar yozdi. Ustozlari boshlagan ishni davom ettirib, "O'zbek tilining chappa lug'ati", "Samarqandlik tilshunoslar" kitobini nashr ettirdi. Umuman, bu inson ziyolilarning eng yaqin maslahatchisiga aylangan, shogirdlarini izlab topadi, ularga qo'lidan kelganicha yordam beradi. Davralarda biror kishining xatosini gapirganini eshitmaganman. Aksincha, suhbatdoshlarini bir-biriga nisbatan mehr-muhabbatli bo'lishga chorlaydi. Yoshlarga yomon so'zlarga mayl qilmaslikni, fitnalarga aralashib qolmaslikni tayinlaydi. Ehtimol shuning uchundir u kishi bilan suhbat quruvchilar juda ko'p.

Bir kuni shogirdlari Suyun domladan kamtarlik, oddiylikning manbai nimadur, deb so'rasang. Shunda u kishi "Ukalarim, inson qalbining halovati, hayotining farog'ati, ilmining kamoloti, muddaosiin erdoli avvalo, uning samimiyatidir", deb javob bergan. Bugun 75 yoshini kutib olayotgan birodarimga meningcha bundan ortiq tarifiy keragi yo'q.

Abdushukur MUHAMMADQULOV,
mehnat faxriysi.

REKLAMA, E'LONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tekzor, samarali va hamyonbop / MUHOJAT UCHUN TELEFON: 66-233-91-56

DA'VOLAR BO'LSA...

Jomboy tumanida xususiy amaliyot bilan shug'ullanuvchi notarius Qodirov Ulug'bek Tolibovich notarial idorasida marhum Igamberdiyev Nasirga (2012-yil 3-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Qodirov Ulug'bek Tolibovich notarial idorasiga murojaat etishlarini so'raymiz.

Manzil: Jomboy tumani Saroy ko'chasi, 15-uy.

Samarqand shahrida xususiy amaliyot bilan shug'ullanuvchi notarius Aliyeva Lola Zoirovna notarial idorasida marhum Xakberdiyev Igamberdiga (1983-yil 7-sentabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Aliyeva Lola Zoirovna notarial idorasiga murojaat etishlarini so'raymiz.

Manzil: Samarqand shahri Amir Temur ko'chasi, 158-uy.

Samarqand shahrida xususiy amaliyot bilan shug'ullanuvchi notarius Jo'rayev Mubin Ne'matjonovich notarial idorasida marhum Mukumov Anatoliy Raximovichga (2018-yil 9-fevralda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Jo'rayev Mubin Ne'matjonovich notarial idorasiga murojaat etishlarini so'raymiz.

Manzil: Samarqand shahri Abdurahmon Soniy ko'chasi, 1-uy.

Samarqand shahrida xususiy amaliyot bilan shug'ullanuvchi notarius Jo'rayev Mubin Ne'matjonovich notarial idorasida

marhum Xudoyberdiyev Akbarga (2013-yil 21-dekabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Jo'rayev Mubin Ne'matjonovich notarial idorasiga murojaat etishlarini so'raymiz.

Manzil: Samarqand shahri Abdurahmon Soniy ko'chasi, 1-uy.

Samarqand shahrida xususiy amaliyot bilan shug'ullanuvchi notarius Jo'rayev Mubin Ne'matjonovich notarial idorasida marhum Xudayberdiyeva Xadicha Imamkulovnaga (2022-yil 25-fevralda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Jo'rayev Mubin Ne'matjonovich notarial idorasiga murojaat etishlarini so'raymiz.

Manzil: Samarqand shahri Abdurahmon Soniy ko'chasi, 1-uy.

Payariq tumanida xususiy amaliyot bilan shug'ullanuvchi notarius Islomov Shuhrat Qarshiboyevich notarial idorasida marhum Amonov Asanmiddin Mixiyevichga (2021-yil 4-oktabrda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Islomov Shuhrat Qarshiboyevich notarial idorasiga murojaat etishlarini so'raymiz.

Manzil: Payariq tumani Chelak shaharchasi, Istiqlol ko'chasi, 13-uy.

Jomboy tumanida xususiy amaliyot bilan shug'ullanuvchi notarius Mamatqulov Otobek Bolbekovich notarial idorasida

marhum Gaziyevo Gofur Urakovichga (2024-yil 8-mayda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otobek Bolbekovich notarial idorasiga murojaat etishlarini so'raymiz.

Manzil: Jomboy tumani Saroy ko'chasi, 15-uy.

Jomboy tumanida xususiy amaliyot bilan shug'ullanuvchi notarius Mamatqulov Otobek Bolbekovich notarial idorasida marhum Safarov Rustamga (2024-yil 8-iyunda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otobek Bolbekovich notarial idorasiga murojaat etishlarini so'raymiz.

Manzil: Jomboy tumani Saroy ko'chasi, 15-uy.

Narpay tumanida xususiy amaliyot bilan shug'ullanuvchi notarius Eshniyozov Dilshod Qurbonovich notarial idorasida marhum Quvondiqov Sherali Muxammadiyevichga (2022-yil 24-mayda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Eshniyozov Dilshod Qurbonovich notarial idorasiga murojaat etishlarini so'raymiz.

Manzil: Narpay tumani "Salovot" MFY.

Samarqand shahrida xususiy amaliyot bilan shug'ullanuvchi notarius Murtazayev Ulug'bek Rabbimovich notarial idorasida marhum Mansurov Faritdin Madjidovichga (2024-yil 7-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mur-

tazayev Ulug'bek Rabbimovich notarial idorasiga murojaat etishlarini so'raymiz.

Manzil: Samarqand shahri Orzu Mahmudov ko'chasi, 12-uy.

BEKOR QILINADI

Samarqand shahridagi "SKY TURKISH ECESPORT IMPORT" mas'uliyati cheklangan jamiyatining (STIR: 305925688) dumaloq muhri va burchak tamg'asi yo'qolganligi sababli bekor qilinadi.

O'zbekiston Respublikasi Vazirlar Mahkamasi huzuridagi Agrosanoat majmui ustidan nazorat qilish inspeksiyasi Samarqand viloyat boshqarmasiga qarashli Past Darg'om tuman bo'limining (STIR: 305580043) gerbli dumaloq muhri yo'qolganligi sababli bekor qilinadi.

TOPGANGA MUKOFOT!

Fuqaro Sultonov Eshmirza Abdinomovich nomiga 2019-yil 17-aprelda berilgan AF 0693058 raqamli haydovchilik guvohnomasi Toyloq tumani hududida tushurib qoldirilgan. Ushbu haydovchilik guvohnomasini topganlardan mukofot evaziga qaytarishlarini so'raymiz.

Telefon: +99890-604-36-03.

Sharof Rashidov nomidagi Samarqand davlat universiteti matematika fakulteti ehtimollar nazariyasi va amaliy matematika kafedrasida jamoasi kafedra professori **Georgiy ZLOTSKIY**ning vafoti munosabati bilan marhumning oila a'zolari va yaqinlariga hamdardlik bildiradi.

O'Z DAVRINING HAQIQIY ZIYOLISI,
MILLATNING CHINAKAM FIDOYISI

- Mahmudxo'ja Behbudiy 1875-yil Samarqand shahrida muftiy oilasida dunyoga kelgan.
- 1902-yilda Makkaga boradi. Qozon va Ufa shaharlarida bo'lib, Yevropa madaniyati bilan tanishadi. Qozon, Orenburgda chiqadigan arab imlosidagi gazeta va jurnallar tahririylari bilan hamkorlik qiladi.
- 1912-1913-yillarda Samarqandda "Samarqand" gazetasi, "Oyina" jurnalini tashkil etadi.
- Behbudiy birinchi o'zbek dramasi – "Padarkush"ni yozib, sahnalashtiradi.

- 1914-yilda Turkiya, Misrga borib, u yerdan muhim kitoblar, o'quv qo'llanmalar keltiradi, yangi usuldagi maktab dasturi ustida ishlashga kirishadi.
- Samarqand shahri yaqinidagi (hozirgi Jomboy tumani) Halvoyi qishlog'ida Ajziy, (Samarqand tumanidagi) Rajabamin qishlog'ida Abdulqodir Shakuriylar bilan hamkorlikda yangi maktab ochadi.
- «Risolai asbobi savod» («Savod chiqarish kitobi», 1904), «Risolai jug'rofiyai umroniy» («Aholi geografiyasiga kirish», 1905), «Muntahabi jug'rofiyai umumiy» («Qisqacha umumiy geografiya», 1906), «Kitobat ul-atfol» («Bolalar xati», 1908), «Amaliyoti islom» (1908), «Tarixi islom» (1909) kabi kitoblar chop ettiradi.
- 1919-yilning erta bahorida mamlakatdan chiqib ketayotganida Shahrizabzda Inqilobiy favqulodda komissiya ayg'oqchilari ko'magida Buxoro amirligi odamlari tomonidan qo'lga olinadi. Qarshida qatl qilinadi.
- Mahmudxo'ja Behbudiy (vafotidan so'ng) 2020-yilda "Buyuk xizmatlari uchun" ordeni bilan mukofotlangan.

Ma'rifatga sarmoya
savobli ishdir

Mahmudxo'ja Behbudiy o'z davrining haqiqiy ziyolisi, millatning chinakam fidoyisi edi. U o'ziga to'q va ilmi oilada tug'ilib o'sdi. Shu sababli ham butun umrini ma'rifatga bag'ishlay oldi, o'ziga qarashli shirkat va yarlardan olinadigan daromadlarni ham xalq manfaati yo'lida sarfladi. Natijada el orasida yuksak salohiyatga ega bo'ldi.



Xalq xonliklarining o'zaro urushlaridan, rus imperiyasi zug'umlaridan charchaganligini hisobga olib, u eng avvalo, millatni, uning farzandlarini savodli, ilmi qilish kerakligini tushunib yetdi. Ana shu g'oyasi bilan atrofiga o'ziga o'xshagan elsevar ziyolilarni to'play oldi. Tariximizda jadidchilik nomi bilan atalgan bu harakat o'sha davrda mintaqamizda chinakam uyg'onish davri edi.

Mahmudxo'ja Behbudiyning siyosiy qarashlari o'z zamonida nafaqat mamlakat, balki tashqi dunyoda ham e'tiborga molik bo'lgan. Xususan, "Haq berilmas, olinur" shiori millat fidoyilarini chinakam hushyorlikka chorladi. O'tgan asrning boshidayoq ma'rifatparvar bu inson Turkiston o'lkasining ma'rifiy konsepsiyasini yaratishga va uni imperatorga havola qilishga muvaffiq bo'ldi. Bundan tashqari, "Turkiston muxtoriyati" harakatining yetakchilaridan bo'ldi. O'zi ta'kidlaganidek, xalq ozodligi yo'lida agar lozim bo'lsa, jonini berishga ham tayyor edi.

Bu insonning yana bir buyuk xizmati shundan iboratki, u o'z hisobidan maktablar ochdi, alifbo va boshqa darsliklar chiqardi, bu harakati orqali xalq ma'rifatiga sarmoya kiritdi. Muhimi, Samarqandda ziyolilar hamkorligida aynan yangi qarashdagi milliy matbuot tamal toshini qo'ydi. Bu tahririya atrofiga Markaziy Osiyoning turli mintaqalaridan ijodkorlar kelib faoliyat ko'rsatdilar. "Samarqand" "Hurriyat", "Kambag'allar tovushi", "Mehnat-kashlar o'qi" kabi ko'plab nomlarda chop etilgan nashr bugungi kunda "Zarafshon" nomi bilan faoliyat ko'rsatmoqda.

Mahmudxo'ja Behbudiy Turkistonda

birinchi bo'lib "Padarkush" dramasi yozdi va bu asarning ommalashuvi orqali xalqqa sahna asari ibratxona ekanligini tushuntira oldi. Tahririyaatdagi va umuman, atrofidagi barcha iqtidorli ijodkorlarni qo'llab-quvvatladi, ularning boshini biriktirdi. Bundan tashqari, musulmon davlatlari ziyolilarini bir-birini qo'llab-quvvatlashga chorladi. Binobarin, "Qozoq qardoshlarimga maktab" nomli essesi mintaqada o'sha davrning chinakam da'vatiga aylandi. Shuningdek, u xalqimizning ilgama intilmaydigan, to'y va ma'rakalardan bo'shamaydigan toifasini keskin tanqid qildi.

Davlatimiz rahbari ushbu qaror orqali bugungi davr uchun Behbudiy g'oyalari, bu almaga o'xshash fidoyi ziyolilar nechog'lik zarur ekanligiga ishora qilmoqda. Negaki millat ma'rifatiga sarmoya kiritish, uni qo'llab-quvvatlash zamonamizning eng savobli ishlaridan biridir. Mahmudxo'ja Behbudiy ijodi, hayot yo'lini puxta o'rgangan rahmatli professor Begali Qosimov, bugungi kunda jadidlar faoliyatini keng tadqiq qilayotgan olimlar Halim Sayid, Qahramon Rajabov, Bahrom Irzayev va boshqalar ham bu jadid bobimiz millat kamoli yo'lida nechog'lik ulug' ishlarni qilganligini ta'kidlamogda.

Kamina Mahmudxo'ja Behbudiy tashkil etgan gazetada bosh muharrir bo'lib ishlayotganidan faxrlanaman va bu yumushning nechog'lik mas'uliyatli ekanligini his qilaman.

Farmon TOSHEV,
O'zbekistonda xizmat ko'rsatgan jurnalist.



1913-yilda
"Samarqand"
(bugungi vorisi
"Zarafshon")

gazetasi tarqalgan
hududlar



Bizlarni
xonavayron, bevatan va
bandi qilgan tarbiyasizlik
hamda jaholatdur:
bevatanlik, darbadarlik,
asorat, farq-u zalolat va
xorliklar hammasi ilmsizlik
va betarbiyalikning
mevasi natijasidir.

**Mahmudxo'ja
Behbudiy.**

"Turkiy bilgan kishi
zamoni bilur"

Turkiston jadidlari sardori Mahmudxo'ja Behbudiy nomi dramaturg, noshir, "usuli savtiya" jadid maktabining asoschisi, mohir pedagog, darsliklar muallifi, "Behbudiy" kutubxonasi tashkilotchisi, jahongashta olim kabi yorliqlar bilan tarix sahifalaridan o'rin oldi.

Yuqorida keltirilgan ta'riflar haqida ko'plab dalillar, isbotlar keltirish mumkin. Lekin Behbudiyning tilshunoslik borasidagi fikr-g'oyalari, nazariy qarashlari, qolaversa, o'ziga xos ta'limoti ham borki, uning tilshunos olim sifatida e'tirof etilishiga asos bo'ladi. Til jonkuyari sifatida chor Rossiyasi vakillari bilan olib borgan mabohasalari, adib tomonidan qo'yilgan talablar orasida o'zbek tilini davlat siyosati darajasiga olib chiqish masalalari ham olimning haqiqiy millatparvar ekanligidan dalolatdir.

Tilshunoslikning bir yo'nalishi nutq madaniyati hisoblanadi. Jadidlarning o'zbek nutqi madaniyatini rivojlantirishda ham o'ziga xos o'rni bor. Behbudiyning bu boradagi qarashlarini bir tomondan milliylikka asoslangan ta'lim usullari va zamonaviy pedagogika ta'siridan ajratib bo'lmaydi. Zotan, nutq madaniyatiga sohiblik malakalari ta'lim va tarbiya jarayonlarida shakllantiriladi. Dunyo tilshunosligida tildan to'g'ri va mahorat bilan foydalanish qoidalarini o'rgatish, ya'ni madaniy nutq tuzishi yo'llarini ko'rsatish bilan shug'ullanadigan soha til didaktikasi

yoki lingvodidaktika nomi bilan ham yuritiladiki, bunda nutq madaniyati va pedagogikaning bir qismi bo'lgan didaktika o'rtasidagi zich aloqa yaqqol namoyon bo'ladi.

Mahmudxo'ja Behbudiy o'zbek lingvodidaktikasi qatori tilimiz me'yorlashuvi, nutq madaniyati rivojiga ham munosib hissa qo'shdi. Tilshunos olim Suyun Karimov o'zining "Behbudiy – o'zbek tilining jarchisi" maqolalarida olimning nutq madaniyati va til me'yori masalalariga ham alohida e'tibor berganligiga to'xtalib o'tadi. Muallifning qayd etishicha, Behbudiy 1908-yilda yozgan "Kitobat ul-atfol" darsligida til amaliyotiga e'tiborni qaratib, yozma nutqdagi, xususan, maktablardagi me'yoriy holatlarga doir mulohazalarini bayon qiladi. Ta'kidlaydiki, yozadigan kishi o'z muddaosini yaxshi tushunsin, bilmaydigan so'zni yozmasin, yozuvda imlo qoidalariga rioya qilsin, chet so'zlarni qo'llashdan tiyilsin, o'qiydigan odamni ham hisobga olsin, sodda va tushunarli yozsin. Ko'rinib turibdiki, Behbudiy bolalarni yoshligidan nutq madaniyatiga e'tiborli bo'lishga, ortiqcha so'zlarni ishlatmaslikka, latif, quloqqa yoqadigan so'zlardan foydalanishga chaqiradi. Yoshlikdan to'g'ri yozish va barchaga ma'qul keladigan adabiy tilda yozish ko'nikmasini shakllantirish masalasini o'rtaga qo'yadi.

Dilafro'z RAHMATOVA.

Xalqaro konferensiyani
yuksak saviyada o'tkazamiz

Davlatimiz rahbarining Mahmudxo'ja Behbudiy tavalludining 150 yilligini keng nishonlash to'g'risidagi qarorida 2025-yil oktabr oyida Sharof Rashidov nomidagi Samarqand davlat universitetida "Mahmudxo'ja Behbudiy merosi va jadidlik harakatini o'rganishning dolzarb masalalari" mavzusida xalqaro ilmiy-amaliy konferensiya tashkil qilish belgilangan.

Universitetimizda har yili muhim sanalar yoki ijtimoiy-siyosiy tadbirlar, ulug' allomalar, olimlar yubileylari munosabati bilan bu kabi ilmiy anjumanlar o'tkaziladi. Bu tadbirlarda fanning ma'lum bir yo'nalishi yoki biror shaxs ilmiy faoliyati bosh mavzu sifatida belgilanib, muhokama qilinadi.

Mahmudxo'ja Behbudiy

merosi va jadidlik harakatiga bag'ishlangan xalqaro ilmiy konferensiyani yo'nalishi ham aniq belgilangan bo'lsa-da, bu ulug' ajdodimiz merosining o'zi adabiyot, dramaturgiya, ta'lim, jurnalistika va noshirlik, siyosiy arboblilik kabi bir necha yo'nalishni qamrab olishi, jadidlik harakatidagi faoliyati esa bundan ham serqirraligi bilan



ajralib turadi. Bu esa konferensiyaga qiziqish yuqori, taqdim etiladigan ma'ruzalar rang-barang va yangi ma'lumotlarga boy bo'lishini ko'rsatadi. Shuning uchun universite-

timizda mazkur konferensiyaga tayyorgarlikni boshladik. Yurtimiz va xorijdagi ilmiy doiralarni bundan xabardor qildik. Konferensiya nafaqat akademik doirada, balki jamoatchilik uchun ham katta ahamiyatga ega. Bu tadbir Mahmudxo'ja Behbudiy asarlarini ilmiy jihatdan o'rganish, jadidlik harakati va uning umuminsoniy ahamiyatini yoritishda tadqiqotchilar uchun yangi yo'nalishlar ochishga xizmat qiladi.

Ta'kidlash lozimki, Mahmudxo'ja Behbudiyning 150 yilligi keng nishonlanishi xalqimizning ma'rifatparvar alloma, mohir publitsist, zuko dramaturg, muhtaram bir zotga bo'lgan ehtiromi, xalqimiz uchun ma'naviy uyg'onish va madaniy merosni qadrlash uchun muhim qadamdir.

Mavlon BOBOXONOV,
Sharof Rashidov nomidagi Samarqand davlat universiteti professori.



Mazkur maqolaning elektron shaklini ushbu QR-kod orqali o'qishingiz mumkin.

MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 13 263 nusxada chop etildi. Buyurtma 11. Hajmi 2 bosma tabaq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyaatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da.

Bosishga topshirildi: soat 19:00

Navbatchi muharrir:

A.SHERXOLOV.

Navbatchi:

T.SIDDIQOV.

Sahifalovchi:

B.ABDULLAYEV.



Saytimizga o'tish uchun QR-kodini telefoningiz orqali skaner qiling

ISSN-201667X



Sotuvda narxi kelishilgan holda

